

## 25 GODINA RADA GEODETSKOG ZAVODA U SARAJEVU



Svečana sjednica Radničkog savjeta

U godini u kojoj obilježavamo 50 godina dolaska druga Tita na čelo Partije, 200 godina od rođenja reformatora našeg jezika Vuka Karadžića, Geodetski zavod u Sarajevu obilježio je i vlastiti jubilej, 25 godina postojanja i rada.

Ponovo je ona lijepa zgrada u ulici VI. Proleterske brigade 69 otvorila vrata i toplo dočekala cijenjene i dragie goste, kolege i prijatelje, koji su, svaki na svoj način dali doprinos i ovom jubileju i proslavi vezanoj za jubilej.

Tim povodom, 19. decembra 1987. godine održana je svečana sjednica Radničkog savjeta. Sjednici su pored delegata u proširenom sazivu prisustvovali predstavnici Skupštine grada Sarajeva, opštine Novi grad, Komiteta za poljoprivredu, šumarstvo i vodoprivredu, Republičke uprave za geodetske poslove i katastar nekretnina Sarajevo, Poslovne zajednice "Jugogeodet" Beograd, predstavnici radnih organizacija, Vojno-geografskog instituta, geodetskih radnih organizacija van SR Bosne i Hercegovine, kao i predstavnici opština u kojima Zavod izvodi radove.

Sjednici su prisustvovali bivši direktori Geodetskog zavoda i Republičke geodetske uprave u Sarajevu, kao i drugi rukovodioci koji se sada nalaze u penziji ili na drugim radnim zadacima, te penzionisani radnici Geodetskog zavoda.

Bile su tu prisutne i 25 generacija geodetskih stručnjaka koji su svoj radni vijek nastavljali, neki započinjali, a mnogi tek rođeni onog dalekog 1. januara 1962. godine kada je i osnovan Geodetski zavod u Sarajevu. Na jednom mjestu sastali su se oni koji su svojim radom i mnogim odricanjima utemeljivali djelatnost tek osnovanog Zavoda, oni koji su svoja bogata stručna iskustva nesebično prenosili na mlađe kolege, oni koji će sa ponosom sačuvati uspjehe svojih prethodnika postignute za ovih 25 godina i obogaćene vlastitim iskustvima i dostignućima savremene nauke i tehnike predati budućim generacijama.

Zajednički su, neko sa sjetom i ponosom, a neko sa divljenjem i nevjericom pratili "izlaganje podataka na javni uvid":

203, konstituirajućom odlukom, premještena radnika u Zavod, oko 1100 stručnjaka bivših radnika Zavoda, sada zaposlenih širom Republike, sa sadašnjih 414 zaposlenih u Zavodu, izvršili su premjer i osnovne radove u milionima hektara, komunalnih uređaja u hiljadama kilometara, komasacije zemljišta, grafičkih obrada i geodetskih podloga za saobraćajnice, hidroelektrane, rudnike, industriju, vodoprivredu, stambene i druge objekte, jednom riječju, svih obilježja koja grad čine gradom, naselja naseljem.

Nizali su se podaci o uspjesima ali i problemima sa kojima su se suočavali svi oni koji ugradiše dio sebe u ovaj Zavod, ali i zadacima koji predstoje pred sadašnjim i budućim generacijama do slijedećeg ovakvog jubileja.

Mnogi gosti, prisutni svečanoj sjednici, u svojim pozdravnim govorima takodje su istakli uspjehe u radu Zavoda i njegov doprinos u životu ove republike. To su potvrdile i desetine telegrama upućenih iz cijele Jugoslavije.

Na kraju, svi prisutni podijelili su radost sa 51 radnikom Zavoda koji su u ovih 25 godina ugradili sva svoja stručna znanja i najbolje godine života a da bi Zavod bio ono što danas jeste. Tim povodom uručena su im pismena priznanja i skromni poklon uz iskrene čestitke i zajedničke želje njima i svim ostalim zaposlenim radnicima Zavoda za nove uspjehe u radu, svim prisutnim i onim koji to nisu iz objektivnih razloga, a podijeliše sa nama radost ovoga jubileja, sretnu Novu 1988. godinu i mnogo ovakvih druženja.

Sana Karamehmedović